

王臨川全集

^ 16
891
10



16
號 891
卷 10



王臨川全集卷四十八

內制 詔書 批答 口宣

賜天章閣待制知審刑院齊恢獎諭詔

勅齊恢省所奏據大理寺日奏司狀四月一日已前下寺公案並已斷絕無見在事具悉卿以才被選典領祥刑蔽罪讞疑遂無畱獄囹空之隆朕庶幾焉閱奏歎嘉不忘乃績

又賜知審刑院齊恢獎諭詔

勅齊恢并獄之畱易以爲戒卿躬有美行服在近班典茲祥刑致用明慎濟之敏給廷讞用空吏稱厥官朕心所喜賜勅獎諭審刑院詳議官大理寺詳斷官等

王臨川全集卷四十八

勅趙文昌等省知審刑院齊恢奏據大理寺日奏司狀四月一日已前下寺公案並已斷絕無見在事朕初嗣服德化未孚永念元元多罹犴獄汝等並膺選推任在讞疑能勵厥官以無留事覽奏歎尚不忘于心

又賜獎諭審刑院詳議官大理寺詳斷官等

勅趙文昌等四方罪獄常患稽留豈唯呼嗟或以瘵官汝等能勤且敏論讞用單閱奏念勞朕心以喜

賜勅獎諭權大理寺少卿蔡冠卿

勅蔡冠卿省知審刑院齊恢奏據大理寺日奏司狀四月一日已前下寺公案並已斷絕無見在事天下之獄決於大理汝能審克不蔽厥成來讞之疑遂無留者惟明以敏

朕實汝嘉

賜特放諫議大夫知潭州燕度待罪詔

卿受命方隅助宣德化姦凶弗率乃觸大誅引慝自歸謂當譴黜萬方有罪責在朕躬雖爾長民豈專任此

賜外任臣寮進奉功德疏

卿方以時材外分邦寄備修禧事來會誕辰廣伽梵之勝緣協華封之善意載惟勤至良用歎嘉

賜特放知成德軍韓贄待罪詔

夫婦相殘政之大恥引愆自劾於義爲宜然德化之美厥成在久任斯責者豈特長然

賜特放懷州傅卞待罪詔

勅傅卞先王教民長幼有序厥或不率歸之義刑卿受任
方州罪人既得閔斯弗迪引責在躬美俗之成蓋非朝夕
一夫抵冒未足以言

賜答德妃苗氏賀南郊禮畢詔

勅德妃苗氏列職內官逮承先帝祀儀獲考慶慰惟均比
覽奏陳具昭誠意

賜答修儀楊氏等馮翊郡君連氏等賀南郊禮畢詔
勅修儀楊氏舊繇德選列職禁闕釐事之成實均慶賴摛
文贊喜良慰朕心

賜大遼賀正旦人使茶藥詔

勅卿以膚使之才將善鄰之禮川塗悠遠風氣沍寒永念

馳驅當加勞賜

賜大遼賀正旦副使茶藥詔

勅卿夙駕使車遠將信幣方茲寒凜固已勤勞宜申諭於
至懷仍就加於寵錫

賜大遼皇太后賀正旦人使茶藥詔

勅卿奉將書幣更涉川途方茲沍寒久於勤勩宜加勞賜
以示眷存

賜大遼皇太后賀正旦副使茶藥詔

勅卿將幣造朝方申舊好建旻取道適會祁寒永惟跋涉
之勞當有匪頌之寵

皇帝問候大遼皇帝書

嘉生備舍華歲幾終惟素講於鄰壙想具膺於時福彌加
葆衛永御吉康

皇帝賀大遼皇太后生辰書

王燭告和方御閉藏之候椒庭集慶載臨誕毓之辰具飭
使車肅將禮幣式修舊好申祝永年

賜南平王李日尊加恩告勅書

勅南平王日尊朕躬執圭幣禮成郊丘無有遠邇並膺休
福卿鎮撫南服功昭于時乃眷忠勤尙加褒顯永肩臣節
茂對寵章

賜溪洞知將州田元宗等進奉助南郊并賀冬賀正

勅書

勅田元宗附綏種落葆衛疆陲能來獻琛以贊釐事忠勤
之意良有可嘉

賜占城蕃王楊卜尸利律陀般摩提婆勅書

勅卿世荷百祿躬有一邦雖道阻荒遐而志存欽順具書
遣使航海獻琛載念忠勤豈忘勤尙因加褒賜式示眷懷

批答文武百寮曾公亮已下上尊號第一表不允

朕以薄德嗣膺基緒繼天理物常懼弗任方賴交修以熙
衆治羣公卿士外暨庶黎欲舉鴻名措之眇質臣民歸美
爲義則多揣實揆時朕猶不

批答文武百寮曾公亮已下上尊號第二表不允

王者奉元以先後天時憲道以始終入事以文制禮作樂

以武戢兵豐財以成萬物之性爲仁以得四海之心爲孝
惟聖時克朕無能焉被之此名祇有慙德矧家多難創鉅
未夷備章而郊欲止不敢因自尊顯良非本懷

批答宰臣曾公亮已下賀壽星見

省表具知乾象粲然官占以告壽祺之應於傳有稽卿等
寅亮帝工阜成邦采摛文告慶歸福朕躬書瑞史篇已循
故事星隆晷德尙賴交修

批答樞密使文彥博等賀壽星見

省表具知穹旻見象以告壽昌嘉與臣民並膺茲福卿等
進繇德選登翊事樞敷奏兆祥請書史策忠嘉之意朕所
不忘

批答富

卿有憂國愛君之心而忠以忘乎已有經邦信時之業而
用未究其能夫蓄久而積博則施之無窮慮深而計熟則
謀無不獲此朕所以有望於卿也矧卿正直不回姦邪素
忌小人所異君子所同是以前在外十年而左右之譽弗及
處躬一德而縉紳之望愈隆朕內度于心外詢于眾自謂
有得卿其何辭

批答不允皇伯祖威德軍節度使榮國公承亮辭免

恩命第一表

卿相予祠事旣獲休成膺國寵章所宜祇受苟爲謙避未
協眷懷

批答不允承亮辭免恩命第二表仍斷來章
卿位重朝廷望隆宗室駿奔郊廟助朕休成受錫爲宜可
無確避

批答不允承亮辭免

省表具知受釐于神人與有慶矧惟近屬德齒兼尊膺此
褒嘉於此爲稱往其祗命以副眷懷

批答不允承亮辭免

省表具知古者朕膺之福與同姓共之矧茲大賚外及蠻
貊爲吾近屬相協休成恩典所加豈容固避

批答樞密副使韓絳邵亢知樞密院事陳升之等辭
免恩命仍斷來章

省表具知祭有惠術賚及庶黎矧吾政事之臣當在褒揚
之首膺斯恩典於體爲宜毋或終辭以勤訓告

批答韓絳邵亢陳升之等辭恩命不允仍斷來章
卿等位爲臣宗躬相祠事膺斯褒顯於體爲宜往服寵章
可無謙避

宣答文武百寮稱賀宣德門肆赦

有制朕升煙泰時登就吉儀駐蹕端門布宣惠澤臣鄰協
豫黎庶交欣賴天之休與卿等內外同慶

宣答文武百寮稱賀南郊禮畢

有制朕裸獻清廟燎禋泰壇協相祀儀旣嘉勤績旅陳賀
禮彌見歡誠賴天之休與卿等內外同慶

宣答樞密使以下賀南郊禮畢

有制朕親稱幣玉祇見郊宮能底熙成實繇顯相羣靈率

顯黎獻交欣朕賴天之休與卿等內外同慶

允目錄作元

賜皇伯祖東平郡王允弼生日口宣

有勅卿齒尊德茂屬近位崇惟時獻歲之期實兆元精之

慶當加好賜以助燕私

賜皇弟岐王顯生日禮物口宣

有勅卿地親魯衛德茂開平方誕毓之嘉辰有匪頌之故

事當馳膚使往瑜隆恩

賜皇弟高密郡王生日禮物口宣

有勅卿德名方劭爵寵兼崇誕毓之辰甫當穀旦匪頌之

禮式示至恩

宣

賜淮南節度使守司徒兼侍中判相州韓琦加恩口

宣

有勅卿位高朝廷德茂百辟相予釐事厥有成勞膺國寵

章是為常典

賜判永興軍韓琦生日禮物口宣

有勅卿位重將旄望隆宰席方懋蕃官之績載臨誕毓之

辰當有匪頌以昭眷遇

賜樞密使西川節度使守司空兼侍中文彥博生日
差內臣賜羊酒米麵等口宣

有勅卿明謨經國碩望冠朝方茲誕育之辰宜有燕私之
禮當加賜賚以示眷懷

賜文彥博生日差男押賜生日禮物口宣

有勅卿才隆國棟位極臣宗惟時盈月之良實兆元精之
慶載臨穀旦當致異恩

賜樞密使呂公弼生日禮物口宣

有勅卿爲皇世臣掌國幾命門弧告慶是謂嘉時臺餽致
恩式昭厚遇

賜觀文殿大學士尙書左僕射富弼赴闕茶藥口宣

有勅卿久亂劇位外寄方口口召節之旣嚴想朝旂之甚
邇宜頒珍劑以喻至懷

賜觀文殿大學士尙書左僕射富弼湯藥并賜詔口
宣

有勅卿屏翰元功台衡舊德數更悲覺有惻朕心因喻至
懷宜頒珍劑

賜觀文殿學士刑部尙書知大名府陳升之赴闕朝
見并賜茶藥口宣

有勅卿擁節過都破關請覲方茲炎瘴固已勤勞當有匪
頒以資輔養

賜觀文殿大學士尙書左僕射判汝州富弼加恩口

宣

有勅卿望隆時棟德茂臣宗方茲釐事之成爰有命書之賜往膺褒顯當體眷懷

撫問判永興軍韓琦口宣

有勅卿內辭鼎輔出撫方垂載惟莅事之勤宜饗齋神之福特申勞問以示眷懷

撫問觀文殿學士陳升之兼賜夏藥口宣

有勅卿久叅台路方部將符輯瑞之來虛懷以竝宜加勞賜式示眷存

撫問鄜延路臣寮口宣

有勅卿等並膺廷選外寄邊虞永念撫循備更勞動方茲

妍暖宜各寧安

撫問延州沿邊臣寮口宣

有勅卿等並因材選外寄邊虞方履盛秋想膺多福特申撫喻當體顧懷

撫問河北西路臣寮兼賜夏藥口宣

有勅卿等時方鬱蒸氣或疵癘永惟黎獻方寄外憂當有分頒以助調養

撫問并代州路臣寮并將校口宣

有勅卿等方以材能外分寄屬當此沍寒之極永惟勞動之多當飭使人往宣朕意

撫問高陽關路倭散諸軍特支銀鞋錢并傳宣撫問

臣寮口宣

有勅卿等各以選掄外膺寄屬比更時序邈在邊防永懷
扞禦之勞當致拊循之意

撫問送伴大遼賀正旦人使副沿路相逢賀大遼皇
太后皇帝生辰使副口宣

有勅卿等抗旛出聘擁傳還朝方春尙寒涉道良苦當加
撫勞以示眷懷

撫問雄州白溝驛賜北朝賀正旦人使御筵口宣

有勅卿等並膺朝選實構鄰歡擁節在疆方豫稱觴之禮
馳輶喻指姑推折俎之恩

賜大遼國賀正旦人使已下生餼口宣

有勅卿等奉將鄰聘來會歲元永懷跋涉之勞宜有餼牽
之禮式昭勤遇當體誠懷

賜大遼國賀正旦人使卻迴瀛洲御筵口宣

有勅卿等奉將書幣旣獲驩成跋涉川途固更勤勩宜頒
燕衍以示眷懷

賜大遼國賀正旦人使見訖就驛賜酒果口宣

有勅卿等奉將鄰聘夙駕使輶旣造見於闕庭方卽安於
舍館宜加好賜以致誠懷

北京賜大遼賀正旦人使卻迴御筵口宣

有勅卿等奉幣造朝抗旛歸國絜懷使節方次都畿特示
燕私以將勤遇

雄州賜大遼賀同天節人使卻迴御筵兼撫問口宣
有勅卿等抗旛歸國總轡在疆方茲炎歊亦旣勤勤就頒
燕衍式示眷懷

就驛賜大遼賀同天節人使卻迴朝辭訖酒果口宣
有勅卿等奉將聘禮來會誕期惟鄰好之踐修嘉使容之
飭備當申頒賚以侑燕私

賜真定府路臣寮等初冬衣襖口宣

有勅卿等水澤將堅風飈載厲永懷黎獻方寄外憂當飭
使輶就頒篋服

賜召學士馮京入院口宣

有勅卿文備國華學該世務祥琴旣御吉服以朝宜復禁

塗往供辭職

賜召滕甫入院口宣

有勅卿夙稱才敏久擅文華當解風憲之嚴以豫論思之
密

王臨川全集卷四十八終

王臨川全集卷四十九

外制

節度使加宣徽使制

門下推轂授師擁旄乘塞擅生殺之柄于外繫安危之體于中厥有顯庸宜膺寵數誕揚孚號明示庶工具官某學足以通大方謀足以斷眾事有經天之業有扞城之材比以明揚屢更煩使遂躋膺仕良副訏謨維塞路之要藩實兵防之重寄職爾鎮撫紓予顧憂蓋爵賞之加不遺於近小豈藩維之任顧可以弭忘用是疇其展案之勞寵以宣猷之號繫謀人之眾允匪朕志之汝私夫任重者其憂不可以不深位高者其責不可以不厚號名之美禮秩之崇

非期假寵以擅榮茲用論功而取稱矧夫守國之園謀王之師聯輔相之籍於殿中具士民之瞻於天下其思祇慎以副褒優可

翰林學士除三司使制

勅三司使天下之盛選也自尙書六官名存實去而三司之職事所總居多則非夫仁明肅艾足以輔世濟物者奚宜任此哉具官某有疏通之才有直亮之操閱言崇議足以經綸王家高文典策足以鼓動當世遂以人望揚于禁林若夫施政之後先生財之本末蓋嘗深思而熟講殫見而洽聞則居天下之盛選主朝廷之大計詢考在位孰如汝宜夫聚天下之眾者莫如財理天下之財者莫如法守

天下之法者莫如吏維予任汝其聽勿疑法之不善者汝得以議而更吏之不良者汝得以察而去則夫調度之不時費出之無常邦用之不給元元困於征求而愁怨於下者直汝之恥也夫行已有恥而後可以爲士矧吾左右信任詢謀所同而觀聽之所在者乎往祇厥官其亡以寵利而爲士恥可

誠勵諸道轉運使經畫財利寬恤民力制

夫閔仁百姓而無奪其時無侵其財無耗其力使其無憾於衣食而有以養生喪死此禮義廉恥之所興而二帝三王誠勅百工諸侯之所先後世不可以忽者也朕夙興夜寐聽治不怠園游宮室之觀無所增飾而躬以節儉先天

下之士然而不忍人之政考諸先王未有以及之也凶年
饑寒民之父子夫婦猶有不得保其家室而放乎溝壑意
者吏或不良不知所以賑救省憂之方而使之至此耶今
吾別諸道置使者使得察吏之良否而視民之疾苦輒具
以言而任事者或不惟朕志之所急而以侵牟之爲故甚
非所以遣使者慰安元元之意也夫轉輸天下之財以給
有司之費皆有常數而無橫求誠能御輕重斂散之權而
禁因緣之姦則何患乎經入之不足彼前世良吏能紓其
民而官事亦不耗廢者豈有他哉亦在乎勉之而已若乃
操聚斂之贏以爲功而不知百姓與足之義非惟逆於朕
志而有司考績之法亦將不汝容焉朕言維服其聽毋怠

可

皇姪右衛大將軍岳州團練使宗實可起復舊官泰

州防禦使知宗正寺制

勅先王糾合宗族而分職以治之所以嚴宗廟也宗廟嚴
則禮俗成而天下治其事豈可以輕哉今朕選於近屬以
修宗正之官亦先王治親之意也以爾具官某惠仁孝恭
忠信純篤故遷厥位以稱禦侮之實而使任事焉夫士之
欲施於政未有不學而能者學所以修身也身修則無不
治矣朕言維服爾往懋哉可

皇姪右衛大將軍泰州防禦使知宗正寺宗實可岳

州刺史充本州團練使制

勅孝子之思慕無窮而送終有既者先王之禮也具官某
祇慎克孝能良於喪去位家居三年於此矣其還位號復
序內朝朕命維新往欽無斁可

起居舍人直祕閣同修起居注司馬光知制誥制

勅先王誥命之文何其雅馴而奧美雖出命非有司之事
而討論潤色蓋有助焉以爾具官某操行修潔博知經術
庶乎能以所學施於訓辭俾掌贊書往諧朕志可

起居舍人直祕閣同修起居注司馬光改天章閣待

制制

勅楊雄曰周之士也貴秦之士也賤周之士也肆秦之士
也拘蓋先王之禮讓爲國士之有爲有守得伸其志而在

上不敢以勢加焉朕率是道以君多士以爾具官某文學
行治有稱于時故明試以言使司告命而乃固執辭讓至
于八九改序厥職以伸爾志是亦高選往其懋哉可

翰林侍讀學士右正言馮京改翰林學士知制誥權

知開封府制

勅學士職親地顯而開封典治京師非夫忠厚仁恕而有
文學政事之能孰可以任此具官某造行直方受材博敏
踐更中外休顯有稱論思禁林尹正畿甸詢謀惟允其往
懋哉可

范鎮加修撰制

勅昔周人藏上古之書以爲大訓而孔子春秋天子之事

也蓋夫討論一代之善惡而撰次以法度之文章非夫通儒達才有識足以知先王不欺足以信後世則孰能託尙書春秋之義勒成大典而稱吾屬任之指乎以爾具官某有該通之材有純潔之操辯論深博溢於文辭論用禁林時議惟允則夫案善惡見聞之實斷是非去取之疑人之所難宜以命爾爾其精思熟考自勉以古之良史毋襲近世比事屬辭之失使來者無所考稽可

右司諫趙抃禮部員外郎兼侍御史知雜事制

勅某朕置御史以爲耳目非更事久而能自稱職則不以知雜事也以爾嘗任言責有猷有爲行義之修士人所譽故遷卽位使在此官悉其誠心迪上視聽義之與比時乃顯哉可

屯田員外郎韓縝改殿中侍御史制

勅某朕使學士五人舉二人以爲御史又於二人擇取一人而以汝爲之汝名臣之子世載榮問愷悌忠信學知大方無蔽于檢人無撓于大吏無迪上以非先王之典而同乎流俗時汝稱職往其勉哉可

兵部郎中沈立可依前官充三司戶部判官制

勅某擅一道之財而開闔斂散之以給縣官之費而又察舉吏士之賢不肖問民之疾苦與夫入佐三司而四方之言利者必稽焉其職事之責等爾汝以才能屢試而行義加修使于東南歲月久矣還禪掌計之治可以慰將命之

勞惟爾博學多聞固嘗知夫百姓與足之義古人有言曰
尊其所聞則高明行其所知則光大矣可不勉哉可

度支員外郎充祕閣校理李大臨三司度支判官制
勅某天下之食貨皆領於三司故朕常難於置使而又考
慎其屬以稱之爾以文學爲官而政事嘗有所試清明敏
達可使治煩往踐厥官其知所守矣可

金部郎中朱壽隆三司鹽鐵判官制

勅某取於山海之無窮以助縣官之不給所以開闔斂散
之不可以無術也非夫廉辨敏明之吏孰能任此者乎爾
純行美材久於煩使往共厥服維是勉哉可

度支員外郎李壽朋開封府推官制

勅某朕布大慶於天下惟士之有能有爲而不獲盡者豈
一日而忘哉爾以政事之材而濟之文學無所避憚以修
厥官陷于吏議失職久矣尹正畿甸四方所瞻姑往佐之
以永民譽可

殿中丞充集賢校理陸經開封府推官制

勅某天下無事休養生息百年於此而京師之人眾矣獨
開封以一尹治之故朕常慎擇材士以爲之佐庶幾乎其
不勞而治也爾材茂質美久於湮阨而智能彌劭行義加
修姑使治煩往其自勉可

太常博士充祕閣校理張洞開封府推官制

勅某開封任重事叢故常擇才士以爲之佐爾以文章學

問列職校讎出試一州風績彌劭膺此遴選往其勉哉可
左司諫王陶皇子伴讀制

勅某自天子至於士未有不待學而成者今朕欲進諸子
於學求可與居者而大臣以爾爲言爾久在諫工有聞於
世茲惟慎選可不勉哉可

樞密直學士施昌言知渭州制

勅夫出河祕文中嚴於禁閣臨渭分閩外肅於戎亭進陪
侍從之聯往膺經略之寄茲爲異數授受惟艱具官施某
才劭兼人聞望映世早據素蘊寢階清塗南榻計庭禕贊
之功可紀西相樞府論思之効尤彰洎出總於藩條且屢
制於邊瑣事經異舉政績用成宜易餘杭之符就撫氏羌

之塞爾其坐護諸將善固吾圉而今而後無西顧之憂者
繫爾之力可不勉哉可

知制誥沈邁知杭州制

勅東南奧區杭越重鎮眷惟師帥之選屬于侍從之良宜
有褒優式示毗倚具官某風姿爽拔器宇闔深早登高妙
之科亟躋通顯之列校文東觀典學擅乎多聞演誥西垣
英辭鼓乎羣動比抗章而請郡期調膳以奉親曾未暮年
已聞報政乃就更於淮海庶益便於庭闈載念錢塘之邦
方虛銅虎之守宜共易俗之命仍選應宿之資服我新恩
寵爾故里與夫引會稽之絨又相萬也爾惟懋哉可

龍圖閣直學士知河陽李兌給事中依前龍圖閣直

學士知鄧州制

勅鄧於京西爲一都會提兵以守常擇大吏且有加命寵榮其行具官某寬和靜深方厚篤實嘗由御史遂爲諫官延閣侍從之班方維帥守之任焯有績效見於事爲序于東省之華寄以南陽之重按撫吏士治軍牧民敷宣詔條鎮靖風俗繫汝能力往其勉哉可

龍圖閣直學士李柬之刑部侍郎充集賢院學士判

西京畱守司御史臺制

勅古之仕者難進易退陵夷至於後世而禮義廉恥幾乎息恬於勢利者鮮矣而苟得躁進者不乏於朝教之未孚朕甚患之顧吾左右親近之臣行義合於古之仕者宜從其志使在位之貪者有愧而慕焉具官某名臣之子能自修敕出備蕃條之任入爲侍從之官而乃力辭顯榮退就閑職別都執憲地清務簡特峻秋官之秩仍通麗正之班吾惟爾嘉其往居息可

知雜王綽吏部郎中直龍圖閣知徐州制

勅某知雜御史於朝廷之士爲高選非精明彊直不能稱其任也爾更踐多矣有聞於時故從遠方召置此位乃以病告至于再三出臨大州進直嚴閣又增郎位以寵爾行其亦懋哉往共厥服可

集賢校理鞠真卿可光祿寺丞依舊充集賢校理知

壽州制

勅某付之千里之地能禁暴去悍拊循鰥寡使良民有以
休息而吏不敢爲侵冤豈非所謂能者哉若爾之材歷選
于朝而久試于外固時之所謂能者朕所加省而不忘今
夫壽劇郡也故徙汝以治之而稽汝歲功當得遷位丞于
光祿其往勉哉可

何鄰知永興軍制

勅朕初卽位慎考俊乂之臣付之方鎮具官某廉清質直
敦大詳敏藝文之學政事之材左右具宜以有聲績作國
西屏雍維大都鎮撫一方老成是賴序遷厥位往牧其人
其勵猷爲以膺任屬可

潘夙轉官知桂州制

勅某桂於西南爲一都會蠻夷荒忽鎮撫有宜故於用人
常慎其選爾清明敏達寬博惠和更事有功簡在朝論遷
序卽位往其勉哉可

尙書左丞余靖制

勅朕有大賚雖疏逖微細必加焉況於位序高任屬重寵
章徽數其可略乎具官某政事之材藝文之學踐更中外
光顯有聲濟登大官鎮撫荒服能率厥職相時休成衍食
序勳往其祗服可

天章閣待制司馬光制

勅陟降左右司朕躬之闕者至親篤信之臣也邦有大賚
其可以後而忘乎具官某政事藝文操行之美有聞於世

簡在朕心相時明禮庀事惟謹進階序爵其往懋哉可

尙書戶部郎中知制誥張瓌制

勅朕宗祀先帝以配昊天而均福釐於在位疏遠微賤無遺者矣又况於侍從之臣乎具官某德厚資深志方行潔安於義命爲世寶臣考慎樂禮相時大事進階序爵其往懋哉可

翰林學士知制誥賈黯轉官加勳邑制

勅朕初卽位奉行先帝故事不敢有廢也具官某剛毅篤實閎深博敏先帝所遺以論思左右者也其遷厥位加賜恩典其往欽哉可

翰林學士知制誥權三司使蔡襄轉官加食邑制

勅朕祇若先帝之初大賚以勞天下職親地禁之臣皆先帝所遺以助朕者也其可以後而忘哉具官某率德秉義以綏寵祿主國大計功昭于時班命有章往欽無斃可

翰林學士兼侍讀學士知制誥充史館修撰王珪轉

官加食邑制

先帝投天下之艱以屬朕身永惟所與濟此者豈非左右之良哉具官某秉哲迪義士民所望論思潤色有補於時大賚之恩外通四海况於親近豈可以忘往服寵章愈其慎哉可

翰林學士知制誥充史館修撰范鎮轉官加勳邑制

勅朕雖哀恫永惟付託之重不敢忘先帝寵綏海內褒厚

羣臣之意具官某敦大闕博清明敏達職親地密爲國信
臣遷序位等申之恩典惟慎厥服往膺顯榮可

翰林學士知制誥權知開封府馮京轉官加勳邑制
先帝以盛德成功克終天祿眇然在疚永念嗣訓非左右
之良孰與濟此哉具官某秉哲蹈義士民所望尹正京邑
善聲流聞邦有大賚當由貴始往膺榮祿無替厥修可

集賢院學士余靖轉官加勳邑制

先帝君臨天下餘四十年功德之所及博矣非文武之士
協力中外何以致此哉在後之侗纂修成法敢忘大賚以
勞眾士具官某敦大闕深清明敏達蕃屏帝室厥功茂焉
恩典寵章往其欽服可

集賢院學士李柬之轉官加勳邑制

先帝棄天下不及班命以勞羣臣朕繼大統其承厥志具
官某廉靜忠恕濟以詳敏能紹世美爲時名臣膺服寵章
往其思勵可

龍圖閣直學士給事中呂公弼改工部侍郎制

勅褒德序功制爲祿位先帝所以熙庶政也朕雖在疚所
不敢忘具官某保身慎行舊有榮聞陟降左右是爲世臣
惠綏西南風績尤顯冬官之貳其往欽哉可

待制司馬光禮部郎中制

勅左右侍從之臣皆先帝所遺以助興政理者也有勞可
錄朕敢忘哉具官某行義信於朝廷文學稱於天下比更

任使會課當遷進位二等以嘉爾績爾方以經術入侍而又兼諫諍之官往其思致厥身使朕之聰明無所不通爾亦維有無窮之聞可

周沆右諫議大夫制

勅堯舜黜陟幽明之法其詳不見於經蓋其考績之次序必始於朝廷之貴者朕率是道進退百官故於邇臣無有私德以爾具官某忠厚謹潔惠和寬博嘗被方維之重任久參侍從之要官內外之勞皆官有賞而以稱士失實控于吏議爲郎武部七歲于茲著論積功進位西省夫職在盡規之地官又以諫爲稱維是將明往其思勉可

右正言知制誥知越州沈邁起居舍人制

勅列名侍從分職方維厥有庸勳朕其甄序具官某端良足以有守精敏足以有謀爲時寶臣典掌明命出撫州部治聲流聞內外之勞進遷惟允序官二等以懋厥勤是謂寵榮往其祇服可

掌禹錫趙良規並祕書監制

勅祕書圖籍藝文之府而置監在光祿衛尉諸卿之右其材實德望當有以稱之以爾具官某等歷官茲多服采惟謹序于卿位簡在朝廷宣布詔條討論典故久於任使亦各有勞宜推增秩之恩以信懋功之法往從官次無或不祇可

王綽祕書少監制

勅朕初嗣位大賜天下文武在位各以序遷具官某出入
踐更名聞休顯奉常之副用勞厥勤乃辭官榮以避親諱
綏予孝子改貳祕書往服寵章靖共無斃可

光祿少卿李丕緒少府監制

勅少府古官於朝廷之位尊顯矣具官某行義祇飭材能
敏達外更器使績用每成有司以聞又當增位往膺秩物
無怠厥修可

司封郎中宋任太常少卿制

勅士以序遷至於卿位亦榮矣非才智有以任事行義有
以保身豈能致此具官某中外踐更久於郎選明習眾事
見稱於時往卽厥官勉之無斃可

江南西路轉運使呂公孺太常少卿制

勅某太常兼夔與伯夷之事非夫執實德望有以過人孰
宜爲之貳也爾名相之子以才見稱出入踐更休有風績
序遷厥位其往欽承可

職方郎中通判太原府馬從先太常少卿制

勅某太常禮秩異於諸卿非文學入官則不得爲其貳也
以爾行治之美才能之敏踐更多矣皆有可稱會課于朝
躋登此位往求自稱惟旣厥心可

解賓王太常少卿制

勅某今之太常兼夔與伯夷之官非夫寅恭清明博習於
禮樂則孰能爲之貳也今朕考行序勞而以爾爲貳於大

常維爾嘗以材稱而屢更任使雖身在外而名位亦云顯矣所以稱此者可無勉哉可

王臨川全集卷四十九終

王臨川全集卷五十

外制

三司鹽鐵副使陳述古衛尉少卿制

勅某考課黜陟之法雖疎迹未嘗不信又況於近而顯者乎具官某以才自奮能世其家出入踐更休有風績列卿之貳其往勉哉可

郭永可光祿少卿制

勅某外廷之位能至於九列者少矣具官某踐更眾職功善自昭年除歲遷以致卿位進寵一等往承惟休可

林億司封郎中制

勅某朕有官祿慶賞以序功而其施始於朝廷之近爾以

藝文被選而多所踐更通籍禁中居官闕下序遷卽位既極左曹往卽寵榮愈其勵勉可

薛求司勳卽中制

勅某朕布大號在延文武之士皆得進官一等而伐閱當遷者又各得以序遷爾中外踐更以才自顯膺此恩典往其勵哉可

權提點成都府路刑獄齊恢度支卽中制

勅某朝廷選實才臣以使諸路而察庶獄之不幸厥有庸勳朕當甄序爾才能行義士論所稱會課有司實應遷法往膺休顯其愈懋哉可

淮南轉運副使張景憲金部卽中制

勅某入佐三司出使諸路皆朝士大夫之高選有勞當錄其可忘哉爾行義之修才能之劭見稱當世簡在朝廷會課進官往其欽服可

三司鹽鐵副使陳述古朝奉大夫司封卽中三司度

支副使趙抃戶部員外郎加上輕車都尉權三司

戶部副使張燾朝散大夫刑部卽中制

勅某人等朕初嗣位奉行先帝故事不敢有廢也具官某等行義稱於世才能見於朝佐國大計爲功多矣序遷位等其往欽哉可

朱處約祠部卽中制

勅某爾嘗爲御史持論不阿出守方州稍遷使任序功增

秩邦法有常往懋厥修以須進選可

孫杭孫琳祠部郎中制

勅某人等都水之官廢久矣朕修之而用爾爲丞爾維才能懋建厥事有司論課當以時遷進序名曹往祗無斃可

提點福建路諸州刑獄公事王陶祠部郎中制

勅某朕選置使者清明于諸路所以待之非輕也爾踐更眾矣才美有稱備任遠方能修其職進遷位等往愈懋哉可

權提點廣南西路刑獄杜千能祠部郎中制

勅某朕初卽位羣臣朝者皆增位一等有功當遷又皆得以序進爾材諳行治見稱於眾奉使于外治聲流聞會課

進官往其祗服可

三司戶部副使張燾兵部郎中制

勅某考績三歲進官一等先帝所以勵羣臣也具官某秉哲迪義有聲于時能勵厥修以宜官政序功增位其往欽承可

苗振職方郎中制

勅某尙書郎中序列五品其於朝廷之位亦已顯矣爾用選擢嘗更任使積功久次得在此位所居三歲宜進一官至今而後得遷乃以爾嘗有謫朕於黜陟豈苟然哉自爾取之而已往思自勉以稱褒升可

王舉元刑部郎中制

勅某薦非其人而與其罰古之道也爾久以才實外更任使風績之劭靡人不稱而任舉有失法當坐免雖更教令猶褫一官以懲上報之稽而塞人言之眾膺踐厥服往其勉哉可

侍御史知雜事判都水監王綽刑部郎中制

勅某御史皆吾耳目之官而折百工以法刑之中者也考其功狀在法當遷則吾豈可以忘哉以爾具官某忠厚諒直有稱於世踐更眾職皆以能聞故真之臺中位次執法名實之善允于人言姑醕積功序進一等位亦顯矣往其勉哉可

胡況都官郎中制

勅某爾以才行自昭于時外分將符內序郎位致勤厥職三歲于茲稽狀有司法當增位進遷一等其往懋哉可

周燮都官郎中制

勅某褒善錄勤邦有常法爾以才能行義登顯朝廷序正郎位三年於此矣進遷一等以懋厥勤勵治我民乃其能稱可

宋孝孫比部郎中制

勅某褒功錄善邦法有常爾共厥官服采惟謹久於郎選會課當遷愈其勉哉以稱新命可

監在京都鹽院錢暄比部郎中制

勅某古者官有職而命有數非有職不足以序羣才非有

數不足以差眾功今官有品猶古之命數也命之數自一推而上之至于九官之品自九推而上之至于一大略蓋無以異而其詳如此不同唯其欲得賢者之在位則古今一也爾以才能行治進序於朝年除歲授既得列於五品久於職事法又當遷其亦可謂寵榮光顯矣其思自勉以稱吾欲得賢者在位之意哉可

三司戶部判官充祕閣校理王繹工部郎中制

勅某三司理財之吏與館閣校文之官皆朝廷儁乂之選也其於進秩有異數焉爾以藝文世家而祇慎謹飭久在此位有勞當遷序于名曹其往思稱可

李章屯田郎中制

勅某褒善錄勤朝廷之政爾才能行治比見推稱會考績之法當增位序進遷一等其往懋哉可

周延儁屯田郎中制

勅某郎中五品而司田以待藝文之士爾大臣之子強學瞻辭出典一州序功當進往祗厥位其克懋哉可

職方員外郎竇綱可屯田郎中制

勅某漢朝不以郎官假貴戚以出宰百里爲不可以非其人今之郎選其重非漢比也而郎中序于五品其授豈可以輕哉爾以文藝起家以吏能從政序遷此位嘉寵爾勞往服訓辭勉求報稱可

職方員外郎王紳可屯田郎中制

勅某郎中序列三等其品皆爲第五非積功久次則不得至焉爾以文藝入官而濟之謹潔久於任使當得進遷茲惟爾階其往祇服可

職方員外郎朱從道可屯田郎中制

勅某尚書郎選於今爲重而郎中列于五品爾精敏強果號爲才臣積功累勤以致此位往共厥服其愈懋哉可

晁仲綽鄭隨可屯田郎中制

勅某郎中序列五品非久於任使有勞而無罰則罕得至焉爾以文藝起家以才能爲吏稱功累善當得進遷往其懋哉思稱新命可

太常博士權御史臺推官杜訢可屯田員外郎制

勅某尚書郎位吾所重也爾名臣之子行義修飭才能有譽而職事無過審官稽狀當以時遷新命維休往其祇服可

駕部員外郎薛仲孺可虞部郎中制

勅某郎中五品於朝廷爲顯位爾悉心爲吏才敏見稱嘗所踐更咸有功最進遷惟允其往懋哉可

提刑楚建中可司封員外郎制

勅某朕置使者以察天下之獄其選擇甚難而視遇之甚厚序功錄善其可忘乎爾行治才能有聲於世服官惟稱會課當遷以懋爾勞往其祇訓可

侍御史邢夢臣可司封員外郎制

勅某待御史於御史之選爲高而尙書郎以司封爲前列爾才能行義嘗見推稱於有言職爲一臺高選任責未久序勞當遷往副司封愈其自勉可

都官員外郎充祕閣校理王昇可司封員外郎制

勅某爾以藝文高第進仕朝廷廉靖謹良有稱於世校文祕閣典事方州甄序歲勞進遷惟允往共厥服其愈懋哉可

權梓州路提刑都官員外郎張師顏可司封員外郎

制

勅某爾修潔精敏達於從政嘗更任使皆以才稱故以一路之庶獄寄之督察方行就事會課當遷往懋厥修以求

稱職可

度支員外郎充崇文院檢討晏成裕可司封員外郎

制

勅某爾以文藝之學在討論之官丞于太常典掌禮樂有勞可錄其以序遷於世大家爾爲能保往思淑慎無廢厥勤可

祠部員外郎充祕閣校理蔡杭可度支員外郎制

勅某序功錄最邦法有常惟敏厥修乃能自稱爾以校讎之選受吾蕃屏之寄材能行治見譽於時而會課有司當遷厥位官無虛授往可勉哉可

權利州路轉運使度支員外郎蘇宗可兵部員外郎

制

勅某朕欲明清于吏民而擇使以蒞之非特使之轉貨財以贍有司而已也爾彊敏謹潔達於從政往充其選克有成勞序進一官愈祇乃服可

三司鹽鐵判官度支員外郎集賢校理王益柔可兵

部員外郎制

勅某任賢使能而繼之以黜陟先王之所以治未有改此者也爾惟賢故序于校讎之職爾惟能故列于會計之官稽狀有司法當增位其遷一等以懋爾勞可

太常博士充集賢校理同修起居注判三司度支句

院錢公輔可祠部員外郎制

勅某序功黜陟邦法有常爾文章博美行義純潔施於政事又以材稱會課進遷蓋惟常法往祇厥位其亦懋哉可

國子博士朱延世可虞部員外郎制

勅某尚書虞部掌天下之山澤而修其時禁郎官職事雖廢而官名猶貴於時非歷試而有勞即不得以在此位若爾之潔廉畏慎蓋知所以自保矣其愈懋哉可

比部員外郎鄭紳可駕部員外郎制

勅某爾勤敏謹潔以修厥官會課有司當得遷位司與之副其往懋哉可

都官員外郎許遵可職方員外郎制

勅某爾進以藝文而兼通律令之學故於為吏常以才稱

第課有司當得進位祇予新命厥往懋哉可

都官員外郎陳汝義可職方員外郎制

勅某審官之法吏有勞而無罪至於三歲則遷位一等亦所以勸也爾文學政率有稱于世久更任使會課當遷往服寵章愈其思勵可

都官員外郎章俞可職方員外郎制

勅某爾以藝文之學政事之材所更滋多皆有善最三載考績法當進遷往踐厥官愈其思勉可

韓繹可職方員外郎制

勅某三歲一遷審官馭吏之常法也然非智謀忠力能舉其職事者亦何以稱此哉爾纘德善之慶而以藝文自奮

施於吏政強敏有聲膺此寵榮其知勉矣可

都官員外郎劉牧可職方員外郎制

勅某朕置使者以察諸路而選才士以佐之爾行義智能比見稱述往共職事會課當遷懋勉厥勤以稱官使可

都官員外郎王易知可職方員外郎制

勅某爾久於試用常以才稱出守一州可有爲矣而有司會錄當得進官往旣厥心以祇予訓可

屯田員外郎謝景初可都官員外郎制

勅某周官司士三歲則稽士任進其爵祿而方今審官之法用焉爾名臣之子操行修潔文學政事有稱於時審官序勞當以時進往踐爾位厥維懋哉可

屯田員外郎何世昌可都官員外郎制

勅某尚書之實多廢矣而郎位尚爲朝廷所重爾藝文操
行政事之材推舉進遷以至於此出佐州治論功應條改
序中行往其祇服可

屯田員外郎陳安道可都官員外郎制

勅某士夫奉法循理以共厥服至於三歲而無咎罰其可
無進遷之法以慰勉之哉爾藝文起家而行義修飭比更
器使實以才稱往服寵章愈其思勉可

屯田員外郎晁仲約可都官員外郎制

勅某褒善錄勤朝廷之政爾清明敏達士類所稱典治一
州風政彌劭有司序績當得進遷往服寵章愈其思勉可

屯田員外郎唐誥可都官員外郎制

勅某爾藝文行治進有可稱爲郎尚書三年於此矣職事
之最法當進遷愈其懋功以對新命可

屯田員外郎林大年可都官員外郎制

勅某士之有爲者豈必慶賞而後勸哉然黜陟者勵世之
通法而爲天下者所不能廢也爾被文蓄德從政有聲會
課當遷序官一列往其勵勉膺此寵榮可

太常博士胥元衡可屯田員外郎制

勅某仕於朝廷者有勞而無罪至於三歲則遷位一等所
以明有勸也爾名臣之子行義修飭以才自奮從政有稱
往服寵章愈其思勉可

王臨川全集卷五十一
太常博士李處厚可屯田員外郎制

勅某爾政事之材藝文之學潔身慎行皆以有稱試請利權是亦煩使序功錄最當得進遷列職南宮往其祗服可比部員外郎呂元規可駕部員外郎制

勅某褒善錄勤邦有常法爾護軍羅將邊漕悉心營職才謂見稱會課序遷往其祗服可

吳充轉官制

勅某士之好德樂善而無求則爵賞有不足以勸焉而爵賞固不廢乎無求之士爾文章行義政事之實士友之所服朝廷之所稱然方試爾于外以觀爾爲而審官上爾歲月之勞法當遷位一等此雖不足以爲爾勸而天下至公

之法不可以廢者也往其懋承之哉可

劉敞轉官制

勅某褒善錄最朝廷至公况吾邇臣在法當陟具官某文章博美政事詳敏心通道德之意躬率仁義之行久於侍從實允詢謀付以方維又能鎮撫甄序乃績進遷厥官朕命惟休往其祗服可

劉覺等轉員外郎制

勅某官所以制祿位之等職所以敘才分之宜視職之廢舉與行之失得而下上其官此吾爲天下立法以廢置賞誅之大體也爾持其行而無失修其職而無廢三年於此矣不可以徒置也宜有賞焉序進一官往欽乃服可

王伯恭轉官制

勅某方今仕於朝廷者率三歲而一遷論者患其不足以勸功然日月久矣能祇慎不怠免於罪悔則亦宜有以褒嘉此朕所以使爾得遷之意也士之爲義蓋有常心何必利焉然後知勸可

王允轉官制

勅某爾能誦先王之言以得祿位施於有政又以才稱丞于殿中歲月久矣博士之選儒者所宜以爲爾官其往祇載可

李正臣轉官制

勅某書曰欽哉欽哉惟刑之恤哉此吾所以建審刑之職而擇取智能之士以爲詳議之官爾以藝文起家又能明習法令靖共厥位有伐當遷姑使序于太常而仍其覆讞之事往爲審克以稱欽恤之意可

劉叔寶轉官制

勅某士之修身慎行宣力四方豈皆以取爵祿之報哉蓋其志有以謂義當如此然而爵祿必稽行治勞烈而加焉今吾序進爾官以有積功之實義不可以無報也在爾自爲則欲知夫義當如此而無志乎寵利然後可以事君往其勉哉尙有終譽可

王臨川全集卷五十終

王臨川全集卷五十一

外制

樞密院編修周革轉官制

勅某語曰前事不忘後事之師也今吾樞密之府自祖宗以至於今不啻百年捍患持危應變之大計與夫將相論議之臣密謀要策有補於世者皆具在此而文書貿亂淆雜而無紀亦何以待後事乎故擇能臣使序次焉而爾以才稱實當其任今遷爾位唯是勉哉可

屯田員外郎任迥等加勳制

勅某等朕獲休享于神而嘉與在位同其福祿爾等並由材選列在郎位相時釐事能勵厥勤甄序有差往其祗服

可

張慎修等改官制

勅某等士之選於吏部者多矣以貌以言而取吾皆不足以得之此吾所以推耳目之任而付之刺舉之臣使各察其所部而以賢才告上今爾等從政于外而為刺舉者所稱故吾召見于廷而秩以省寺之官往其勉思所以事君無使稱爾者受不任之咎可

徐師回等改官制

勅某等詩曰不懈于位民之攸壘蓋吏能夙夜不懈於其職事以無過失然後民得以服勤而有勸功樂業之意吾所以制為祿位以待天下之吏以時論其功狀而進退之凡以為民也爾等並列於朝而久於其職序遷爾位惟是勉哉可

磨勘轉官制二道

勅某等有司考爾等之伐閱而揚爾等於朝廷朕親覽焉皆應遷法夫命官賦祿之事朕非輕之也維以章有德序有功名在審官則三歲而一遷亦維以閔夫職事之勞而勉之盡力爾等勿謂名器之可計日以自取也而無報上之意焉可

二

勅某虞以九載黜陟庶官周以三歲誅賞羣吏其為法異而勸沮之意同爾之積功實應遷法序進厥位維以勸能

書不云乎德懋懋賞爾則善也朕何愛焉可

明堂宗室加恩制

勅某朕既肆祀於明堂而大賚以布神之福爾列名屬籍序位內朝肅雝在庭克相釐事以差受寵其往懋哉可

皇姪孫左屯衛大將軍登州防禦使世永改隴州防

禦使制

勅朕永惟太祖皇帝德加於後世博矣而諸孫爵位莫有顯者甚非所以惇敘九族承宗廟之意也具官某躬率德義克承厥休方將營衛之屯而領兵防之任其正使號稱朕志焉可

皇姪右衛大將軍蘄州防禦使從古登州防禦使制

勅朕選於近屬以治親親唯賢與能宜在此位具官某躬率德善自昭于時以選攝事久勤不懈其遷使號而正其職服之名焉往踐寵榮愈思慎茲可

皇姪曾孫太子右內率府率令磋右千牛衛將軍制

勅某治天下自人道始而以治親爲先務爾序于屬籍率履不違遷率東宮十年於此矣進踐祿次往其欽承可

鄭穆太常博士制

勅某士之著籍審官者雖在疏逖猶三歲而一遷又況以才被選有職事於禁門之內者哉嘉爾言行發聞于世膺此恩典往其欽承可

錢袞太常博士制

勅某太常古宗伯之官而博士掌其掾法增損因革皆合於事久而不失先王之禮意然後可以爲能其任固已重矣今雖職廢而非文學出仕則不得以名官爾以敘進而膺此選其尙能勉以求稱哉可

集賢校理周豫太常博士餘如故制

勅某籍於審官之士雖身在外有司會其伐閱歲滿輒遷况於以才進選而列職祕近者哉爾維峻良膺此恩典往其祗勵以服寵榮可

楊南仲太常博士制

勅某爾文學藝能見稱於世服官惟謹克以有勞丞于太常是謂華選遷秩博士往其欽哉可

姚原道太常博士制

勅某爾以藝文出仕而才諳見稱備任遠方有勞當錄博士之選往其欽哉可

晏崇讓太常博士制

勅某爾名臣之子行義修飭能以藝文自奮而於職事有勞序遷厥官其往祗服可

劉温太常博士制

勅某爾丞祕書三年矣故稽爾功狀秩于太常爾行義才能有稱於世無曰官小往其欽哉可

柴餘慶國子博士制

勅某爾於爲吏才敏見稱會課有司當得遷位博士之選

往其勉哉可

邵亢太常丞制

勅某古者尚賢而輕爵好藝而賤祿所以士樂羞其行而為時用也爾列于東宮之職事三年於此矣羣牧之任開封之選皆能稱職遂佐三司其序爾功進官一等若爾之藝文政事吾豈有愛於爵祿乎哉往懋厥修以需其後可

蔡說殿中丞制

勅某宗祀之成慶覃疏迩爾久於常選丁此殊恩甄序有榮往其祗服可

晁仲熙殿中丞制

勅某爾以謹潔能不失其世守故積功久次致位於朝往

佐一州又應遷法愈其懋勉以稱褒嘉可

王元甫殿中丞制

勅某吏之有籍於審官者三歲一遷所以勸勞也爾以才備任積課應條往服命書愈其思勉可

高應之國子博士張侏太常丞范褒殿中丞制

勅某等爾等親吾民于外而吾使有司會課于中皆能有勞以應遷法夫上之爵賞無私德惟以治人臣能率職以治人則可謂能報上矣各踐爾位惟時勉哉可

胡掖殿中丞制

勅某汝官在東宮而得列於朝廷之位有司奏課當以時遷夫祿所以等功位所以序德朕所以命汝者每加厚矣

汝所以報稱者亦可以勉哉可

王介祕書丞制

勅某朕設科以來異能之士而親發策問之爾言不阿而學問多中乎義理其遷厥位以嘉爾之能言夫士無不能有不爲爾若爾之修潔有志而濟之以明敏之才惟所施焉將無不至况於一官之小豈以不稱爲患也哉可

毛箠祕書丞制

勅某古人有言曰無常產而有常心者唯士爲能夫所謂士者不以無常產而變易其心又奚俟於爵賞而後勸哉然士之有功則爵賞加焉天下大公之法也爾以進士起家而序於王官之列出長一邑之民有勞而無罪三年於

此矣其使遷秩以信大公之法朝廷之位亦加顯矣所以爲士者可不勉哉可

許懋傅顏並祕書丞制

勅某爾雖任職于外而功罪之籍實在審官之府以時會課於法當遷夫三歲而序一官在會之所同然材實行治不有以稱其位則孰以爲非苟得也爾以藝文自奮而由稱舉以至於此其知之矣可不勉哉可

陳舜俞祕書丞制

勅某爾以賢良應詔朕嘗親策而秩以京官幕府三年序遷一等此特有司之常法爾豈所以待異能之士哉往其勉之以候時用可

王路川集卷五十一
九
句士良祕書丞制

勅某爾佐著作于祕書三年矣審官稽狀當進一官惟爾以文藝起家而以吏能爲邑往欽新命其克勉哉可

國子監直講商傳光祿寺丞制

勅某爾讀羣經而能通知其義故選於眾以教國子有司稽任當以勞遷在服爾官愈其思懋可

張璘光祿寺丞制

勅某爾父爲吾執政之官而爾能夙夜祇飭以修其職事可謂能世其家矣今有司會課而吾以爾丞于光祿往思勵勉以永燕譽之終哉可

王崱光祿寺丞制

勅某詩曰維其有之是以似之以爲賢者之後功臣之世非有以存之則無以似續其前人也爾以蔭籍入官而能舉其職以應有司之遷法可謂知似續其前人矣丞于光祿其往勉哉可

王佺光祿寺丞制

勅某爾大臣之家賢者之後能自策勵不隳其官序勞當遷往踐厥位無忝爾祖乃惟顯哉可

奏舉人前陝州節推郎凡衛尉寺丞制

勅某選於吏部者多矣非使在位者舉其類則善人豈能自進乎爾能勵厥官以多薦者丞于衛尉其愈祇修可

孫琪衛尉寺丞張次元大理評事制

勅某等材施於一邑知效於一官至於三年而無職事之負焉不可以無報也序進一等往其懋哉可

柴元謹衛尉寺丞制

勅某商之有征久矣所以銷沮游末而勸之力本非特收其贏材佐公上之急而已也爾勤其事以有累日之功序進一官以從大雅無德不報之義爾維世族尙克勉哉可

奏舉人前梓州郫縣主簿陳巨卿衛尉寺丞奏舉人

前權復州軍事推官孫琬大理寺丞制

勅某選於吏部者多矣非使在位者舉其類則善人豈能自進乎爾能勵厥官以多薦者丞于卿寺其愈祇修可

張服尹忠恕張慎言孫昱太子中舍制

勅某周官三歲則大計羣吏之治而誅賞之故朕時憲以爲考績之法夫吏者三歲能率職礪行而無罪悔是宜有賞序官一等以慰爾勞維爾良能宜加報稱可

薛昌弼雷宋臣太子中舍劉師旦殿中丞制

勅某審官考課之法成於先帝之時朕維奉循以職名器無有親疎遠近使有司一是以待之嘉爾有勞序遷一等勉共爾位率志忘私庶乎能稱爵賞之公而終無尤於職事可

方蘋高安世張湜傅充並太子中舍制

勅某等吾於爵祿甚慎閔仁百姓甚篤爾等或專一縣或佐一軍而皆列於卿丞之籍蓋嘗有所試矣今有司序功

當得遷位吾雖甚慎爵祿而於爾等無所愛焉其勉思拊循百姓以稱吾閔仁甚篤之意可

黃汾太子中舍制

勅某吾擢天下之才而立民長伯萬家之縣又有戎馬之任焉其稱甚難而爾能其事有勞遷秩毋廢爾成可

王塾太子中舍制

勅某爾丞于理亦既三年有職事之勞無行義之過使遷厥位著籍外廷夫與於燕而坐於朝報禮亦云異矣祇修乃服其可不思可

奏舉人前永興軍節度掌書記王申等太子中允制

勅某等皆以藝文起家而久於常選才能行義數見推稱

揚于朝廷各命以位往共厥服可不勉哉可

雷宋臣太子洗馬制

勅某周人事神以諱而不諱嫌名持循至今遂著爲律爾以難避之諱而辭當拜之官自言冒榮有所不忍其更位號以慰孝思慎爾百爲勉求稱此可

熊本著作佐郎制

勅某吾歲取吏部之選者以爲宮監省寺之官常不啻乎白人論者患其多焉詩不云乎濟濟多士文王以寧有天下者豈以士多爲患哉顧其所取何如爾汝藝文政事皆見稱述往踐舉次蓋將有補於時使人視吾所取而不以爲多在汝勉之而已可

高旦著作佐郎制

勅某唐虞以三考黜陟幽明而其所命或終身於一職然則其所謂陟者蓋爵服之加而已今之增位猶古之加爵服也以爾久於職事而功用應於有司之法故使增位以報焉雖考績之歲月與黜陟之方古今不同而吾所以褒勵庶工非與唐虞異意爾其毋怠思稱厥官可

國子監直講孫思恭著作佐郎制

勅某爾才能行義有超卓之譽於時故遷於眾以教國子而又寵以校讎之官有司稽勞當得遷位列職東觀往其懋哉可

奏舉人前祁州深澤縣令王廣廉著作佐郎制

勅某爾用舉者爲縣又能修其職事而舉者眾多升序厥官屬之東觀夫士之有能有爲也豈必戒敕而後勉哉爾以才稱其知自勸矣可

奏舉人編校昭文館書籍孫覺著作佐郎制

先帝置校讎之官所取皆天下望士爾惇行力學爲時俊傑治民有紀稱者眾多會課進遷往共厥服可

奏舉人姚闢著作佐郎制

勅某祕書省有著作之官所以待藝文之士爾瞻辭博學而爲吏有聲甄績序材以登茲選往共職服其亦勉哉可

奏舉人游烈等著作佐郎制

勅某等皆以藝文起家而久於常選才能行義數見推稱

揚于朝廷各命以位往共厥服可不勉哉可

奏舉人張公庠著作佐郎制

勅某爾嘗爲令而能以材諳爲在勢所稱寘諸京官以懋乃績往踐祿次愈其勉哉可

高膚敏崇大年並著作佐郎制

勅某爾等皆以才能序于幕府舉其職事稱者眾多會課超遷往其祇服可

潘及甫著作佐郎制

勅某等選於吏部久矣能以才自奮爲在位者所稱稽狀有司列官省寺往須器使無替厥修可

奏舉人阮邈著作佐郎馬好賢大理寺丞制

勅某等省寺之有丞郎其名位高下不同而於今皆爲遴選爾等從事于外以能見稱有司書勞朕所親覽各踐厥位往惟慎哉可

直講劉仲章大理寺丞制

勅某爾方以經術教國子而有司會課當得進遷爾以通經發聞于世允蹈所學尙何訓哉可

施遜大理寺丞制

勅某三歲一遷朝廷之法爾共其職事在法當遷往懋厥修以祇朕訓可

奏舉人周同大理寺丞制

勅某爾能勤厥官以有舉者有司條奏在法宜遷使得傳

王臨川集卷五十一
籍於審官以爲大理之屬當知夫名器之不可以徒得也
往思懋勉以稱之可

吳安操大理寺丞制

勅某爾名臣之家能自修飭考論功最當得進遷往服官
成勿墮所守可

高定大理寺丞制

勅某朕布功賞之信苟有功可以中率則無擇小大遠邇
而加焉今有司條奏爾勞在法當賞往丞于理其懋厥官
可

林宗言大理寺丞制

勅某有司言爾當遷而朕視功狀如有司之言故使遷爾

位一等吾嘗詔有司以時視士大夫功狀而敘進之毋使
自言欲夫在位知有禮讓而不以官爲利也爾知之矣可
不勉哉可

徐縝大理寺丞制

勅某爾出於世祿之家而服勤筦庫之事行不愆於法才
不曠其官遷以報功往其思勗可

李文卿大理寺丞制

勅某吏之近民者莫如令故位非高也祿非多也而吾不
輕以與人爾得爲之以有稱者往施於政又以才稱寘諸
京官以待任使思永終譽厥惟勉哉可

奏舉人陳仲成大理寺丞制

勅某歛之爲州也窮於山谷之間吏常患乎州窮而刺舉者有所不知爾勤其官而稱者甚眾可謂能矣其進以爲京官往懋乃成以終有譽可

張謹大理寺丞制

勅某古之爵賞與士共之雖有眾譽而功實不副焉亦不可以幸而得也此吾所以閱稱舉之眾而又稽歷試之勞然後命爾以丞于大理也夫去吏部之選而有錄於審官能祇慎不懈以免於文吏之議則雖高位尙可以循而至可不勉哉可

鄭民表韓燧大理寺丞制

勅某爾服勞州縣才諳見稱甄序厥功使丞于理往祇休

命惟旣爾心可

吳太元大理寺丞制

勅某審官之法三歲一遷爾嘗有罪故使序于大理四年而後遷以爲丞賞誅黜陟吾無私焉皆爾自取也施於有政可不勉哉可

奏舉人劉公臣白贄並大理寺丞制

勅某等今吾大吏舉非其人有坐斥廢其於舉人豈顧不愼哉然而坐斥廢者時時有之此殆求舉者不一其始終以負之爾今爾等皆以眾舉故吾命以京官勉思一其始終以無負於舉者可

國子監直講編校集賢院書籍錢藻大理寺丞制

勅某朕設科以招方正之士而爾應其求置局以儲雋乂之材而爾充其選有司會課當得進官若爾之諒直多聞方且善其行以爲時用往祗厥位可不勉哉可

段叔獻大理寺丞制

勅某以爾典京師之獄滿歲於此矣而未嘗有失丞于卿位以懋爾勞維朕哀矜庶獄之有不辜爾所知也守爾常操尙無誤哉可

奏舉人于觀大理寺丞制

勅某方今漕頻海之鹽以食東南而收其息以佐有司之急倉庾之官一失職而至於耗惡則足以匱國而傷民故稱舉能吏而待之厚賞所以勸也爾從其事能有成勞丞

于理官往踐無懈可

馮翊辛景賢大理寺丞制

先帝使大吏推舉常選之士以補省寺之屬爾能修其職事而舉者眾多卒由舊章命爾以位往祗厥服以稱甄升可

試大理司直兼監察御史朱棟之大理寺丞制

勅某爾以幹謹潔能舉其職事而屢爲在位者所舉歲滿序功法宜有賞理官之屬其往懋哉可

陳確大理寺檢法官制

勅某朕制中典以刑四方非惟不失天下之姦唯以使人無犯有司而已今明試爾才之可使而後以爲屬於理官

爾其知恤庶獄之不幸而求所以出之以稱朕哀矜元元之意可

魏綱大理評事制

勅某爾備屬奉常亦已久矣序進厥等以旌有勞夫三歲一遷雖厚祿可以馴而致欲爲善者亦如此矣能積智累勤而不已則亦何所不至乎在爾勉之以求爲可進也可

石祖良大理評事制

勅某士之有籍於審官者皆三歲而一遷今爾歲滿故吾進爾位加爾祿夫祿以等功而不以志位以序德而不以勞爾世厥家其知勉矣可

應才識兼茂明於體用科守河南府福昌縣主簿蘇

軾大理評事制

勅某爾方尚少已能博考羣書而深言當世之務才能之異志力之強亦足以觀矣其使序于大理吾將試爾從政之才夫士之強學瞻辭必知要然後不違於道擇爾所聞而守之以要則將無施而不稱矣可不勉哉可

何景先何景元並大理評事制

勅某春秋之義以貴治賤以賢治不肖今天下人民之眾賢者不爲不多爾得列于京官其賢於人宜如何也今爾累日之課又當遷序其位亦云不賤矣其爲賢也亦可以勉哉可

張璠大理評事制

勅某吾推恩大臣之子爾得列於祠官能任事而有勞其
以備士官之屬爾父起於閭巷以能大其家室者豈一日
之力哉爾惟積勤累善法象而不違則豈特有慶于而宗
又將有賞于而國可

前鄉貢進士許將大理評事簽書昭慶軍節度判官

廳公事制

先帝親第進士於廷而以爾爲第一爾於藝文可謂能矣
所以施於政者朕將有所試而觀焉夫士之遇時不患無
位思所以立往其勵勉以副揀求可

王臨川全集卷五十一終

王臨川全集卷五十二

外制

孫寔大理評事制

勅某爾名臣之子能飭身慎行強學自奮而有司會課當
以序遷其進一等以爲士官之屬往共爾職其克懋哉可
韓鐸試大理評事充天平軍節度推官知遂州遂寧

縣制

勅某爾用薦者爲令又以修治見稱試職士官序于幕府
字人之任其愈懋哉可

王任試大理評事充節推知縣制

勅某爾任舉者爲令而能修其職以見推稱命爾以爲幕

府之官而又試以字人之事夫南面而聽百里豈輕也哉
維能強恕以求仁然後副吾置吏爲民之意可

徐瑗試大理評事充保信軍節推知梓州射洪縣制
勅某有百里之地而人民社稷之事繫焉其任豈可以輕
哉爾嘗試矣見謂辦治故又任爾以吾所重而寵以幕府
之官往其勉哉無慢予訓可

王夢易試大理評事充永興軍節推知遂州青石縣

事制

勅某朕常命汝以幕府之官使長百里之民而汝以喪自
解今除之矣其就故官有社與民往其思勉可

縣尉廖君玉太常寺奉禮郎制

勅某爾職在追胥有功中率故襲序爾使得列于太常之
屬朝廷慶賞之信如此爾其可不勉哉可

陳周翰太常寺奉禮郎制

勅某爾久於職事能以有勞命課于朝當得遷敘奉常之
屬其往欽哉可

太常寺太樂署副樂正李允恭可太常寺太樂署太

樂正太常寺攝樂正耿允恭包文顯可並太常寺

太樂署副樂正制

勅某等太常上其屬有闕而以爾等聞惟爾等皆善於修
聲而任職久矣其遷副正以爲署長而使攝正署副正往
勵厥官無敢豫怠可

英宗卽位覃恩轉官龍圖閣學士至龍圖閣直學士制

勅永惟左右有能有爲之臣皆先帝遺朕以熙眾功者也方惟大賚以勞天下其可以忘而不及哉具官某惠和敦大明允忠篤列職近侍實爲名臣褒序有加往欽乃服可

發運轉運提刑判官等制

先帝享國四十餘年內外晏然克終天祿豈非獻臣才士依助之力哉不及班命以勞功而朕承厥志爾奉將使指久以才稱膺此寵章往其思勵可

卿監館職制

勅朕初卽位奉行先帝故事以勞天下其施及於疏遠而

可以忘於近者哉具官某序于書林伐閱多矣率德迪義有稱于時膺踐寵榮往其思愓可

京官館職制

先帝棄天下朕初卽位纂修故事以勞羣臣爾等序于書林皆以才選褒進有典往其欽承可

分司致仕正郎以下京官等制

勅某等朕初嗣位敷錫庶正非特勞在事之勤亦以禮天下之賢者爾等以才出仕登序王官或就里居或分留務往膺寵數咸懋厥修可

諸司使副至崇班內常侍帶遙郡不帶遙郡制

勅某等朕初嗣位奉行先帝故事大賚四海阻深幽邃無

所不及矣又況朝廷之近臣豈可以忘哉爾等能以忠力
靖共職事進位一等往其欽承可

皇兄叔大將軍以下制

先帝顧哀宗親德念至深厚矣在後之侗其可以忘哉具
官某躬執義行序于屬籍承休席寵亦既顯榮喪進有章
往欽無斃可

皇兄姪大將軍以下制

勅某朕大賜於天下雖疏以遠無遺者矣又況於宗室之
近哉爾序官內朝克有善聞繩繩之慶協於聲詩喪命有
加往其祗服可

覃恩昭憲杜皇后孝惠賀皇后淑德尹皇后孫姪等

轉官制

勅某等予大祭于廟祧而哀夫先后之家寢替而不章乃
詔有司博求其世爾等名在戚里序于王朝各因其官增
位一等冀以上稱神靈之意豈特慰予追遠之心可

中書提點堂後官制

勅某等朕大賚于天下有政有事者皆得以序遷爾等各
以選掄備官宰旅增位一等往其欽哉可

李端卿等舊官服闋制

勅某孝子之悲哀思慕其親豈有窮哉然喪以三年而止
者聖人之政也爾以喪致事日月既除其就故官以聽新
命夫人之行莫大於孝而孝亦在乎事君能致其身而不

愆於義以辱其名然後可以爲孝子此宜爾之所知也其勉矣哉可

前太常寺太祝張德溫舊官服闋制

勅某喪三年亦已久矣而人子之志無窮故欲爲不善則思貽父母惡名而終於不果不如是則不足以爲人子復爾祿次維時勉哉終於立身可謂孝矣可

前屯田員外郎任迴舊官服闋制

勅某汝有列於朝廷而以憂去位人子之事親終矣則君臣之義其可以忘乎夫移於君而忠移於官而治然後可以爲孝往共爾服惟是勉哉可

前太常寺奉禮郎宋輔國等並舊官服闋制

勅某爾以親喪去位日月旣除其來造朝復就官次終身之孝可不勉哉可

前大理寺丞劉辯前衛尉寺丞孫公亮並舊官服闋制

勅某爾服纓去位順變當除三年之喪亦已久矣君臣之義其可廢乎趣還于朝使卽舊秩勉思移孝之事以就顯親之名可

前大理寺丞王忠臣舊官服闋制

勅某御史言爾以喪釋官日月當除故吾下命書于御史以俟爾之來見爾雖舊官吾命維新其加勸勉求合於以孝事君之義可

前太子中舍張諷舊官服闋制

勅某喪三年天下之達禮也爾能率禮以至終喪其來造朝復爾祿次事君之義爾實知之無違厥初是謂能孝可

前職方員外郎元居中舊官服闋制

勅某尙書郎位三等而爾方以勞序于前列乃以喪去三年于家今旣禫除其還祿次維爾才美有稱於時移孝事君當知勉矣可

前太常博士張詵舊官服闋制

勅某爾去位里居三年於此旣除喪矣其就故官忠以事君是爲孝子爾惟知義可不勉哉可

前將作監主簿張扶舊官服闋制

勅某爾遭齊斬之喪而去位釋祥禫之服而還朝班吾命書授爾祿次孝子之事終於立身施于有官可以勉矣可

前駕部員外郎李安期前殿中丞張德瀄並舊官服

闋制

勅某禮有三年之喪者無貳事也知喪而已矣先王以爲不如是不足以盡人心此吾所以歸爾于家而不敢勞以事今日月除矣故吾班命書于御史而召爾以來往踐故官勉思終孝可

前內殿崇班馬文德舊官服闋制

勅某爾執親之喪三年於此矣其班新命以復故官維孝有終爾宜思勉可

供備庫副使康璫舊官服闋制

勅某三年之喪苴麻哭泣之哀一也而亦有權制以趣時此吾獨使武吏之有籍於樞密者得終喪于家之意也爾能率禮今服既除其就故官以承新命可

皇姪右監門衛大將軍仲營服闋舊官制

勅某送終者人子之大事也爾以喪釋位亦既三年能以禮自致而不犯詩人素冠之義於爲人子亦可謂孝矣還就祿次帥初無違可

同中書門下平章事韓琦奏親姪孫恬守祕校同中

書門下平章事曾公亮親男孝純將作監主簿姪孫謙試祕校樞密使張昇奏親孫男戒守祕校叅

知政事歐陽脩奏男辨太常寺太祝叅知政事趙

槩奏孫男尤緒太常寺太祝樞密副使吳奎奏長

男璟守太常寺太祝次男瓌試祕校制

勅某朕受純嘏於神靈而布之在位其官顯者得任其子弟以及孫曾爾生大臣之家是爲賢者之類往保祿秩可無愼哉可

同中書門下平章事韓琦奏親姪女之子曹復真定

府戶曹制

勅某維名與器朕未嘗輒以假人爾緣大臣相祀之恩遂階一命之寵出而從仕可不勉哉可

樞密副使胡宿奏親兄亶守祕校制

勅某宗祀之恩仕之顯者皆得官其親族爾躬率善行而有弟爲吾政事之臣往服寵榮懋修無斁可

天章閣待制司馬光親兄之子宏試將作監主簿制先帝有大慶推恩羣臣子弟而爾有叔父實爲近臣往卽厥官無墮世祿可

廣南東路轉運使祕閣校理蔡杭男潛試將作監主

簿制

勅某將漕遠方者皆得官其子弟爾父以才自奮有顯於時往懋厥修以綏世祿可

故贈司空兼侍中龐籍遺表男太常博士元英可屯田員外郎制

勅某等爾考有庸先朝致位將相歸安第宅而以壽終爾等服采于時實能嗣訓並膺恩典其往勉哉可

龐籍遺表男內殿崇班元常大理寺丞制

勅某士之文武異用久矣爾世以儒學顯而有官籍於內朝從爾父之遺言而以丞于大理往惟嗣訓乃克保家可龐籍遺表孫保孫寅孫並將作監主簿制

勅某爾祖嘗爲將相佐佑帝室朕哀其亡也故序爾於工官夫大臣之家能久而不失其世者鮮矣往承厥慶可不勉哉可

龐籍外孫陳仲師試將作監主簿制

勅某朕命爾以試工官之屬者特以爾之外祖常爲將相

於先朝而已然士之由保任而後能自奮以至休顯者多矣往踐爾次可無勉哉可

太子少傅致仕田况遺表男守祕校至安太常寺太

祝制

勅某雋哲之輔有勞於時福祿旣成而爾嗣厥後於其將死以爾爲言膺此寵章宜知勉矣可

故資政殿大學士知河南府吳育遺表孫男儼倅並

守將作監主簿制

勅某等朕所以顧恤大臣之家而序錄其子孫未嘗有愛焉況如爾祖賢明諒直有補於世朕常思而不忘者乎其各加爾一命以爲工官之屬詩曰夙興夜寐無忝爾所生

往其勉哉可以爲孝矣可

翰林學士承旨宋祁遺表男俊國廣國守祕書省正

字令持服制

勅某等爾考承密命于翰林而不幸至於大故眷懷舊德甄序爾官往其有成祗服予采可

宋祁遺表孫松年延年並守將作監主簿制

勅某等貴臣之世賢者之後朕所不能忘也故爾等皆在冲幼而列于工官茲所以佑序爾家亦云至矣爾所以保其祿位可不勉哉可

刑部侍郎致仕崔嶧遺表親孫男俞將作監主簿制

勅某爾祖嘗服高位考終于家以爾爲言朕其甄序工官

之屬往矣懋哉可

戶部郎中直龍圖閣知明州范師道遺表第三男世

文守將作監主簿制

勅某爾父嘗以才選列官于朝出臨一州奄至大故錫爾一命爾其勉哉可

光祿卿直龍圖閣張方遺表親男平易守將作監主

簿制

勅某朕惟爾父致位九卿服勞于官爲日久矣故命爾以工官之屬以稱其將死之言爾其思爾父之顧厥家與朕心之哀爾父夙興夜寐無或弗欽可

光祿少卿知單州呂師簡遺表次男昌宗試將作監

主簿制

勅某爾父且死而爲爾求官故以爾試于工官之屬夫推恩旣往覃及子孫吾所以待人臣者有常法矣修敕自奮而以保祿位者爾所以爲人子也可不勉哉可

故光祿卿致仕張鑄遺表親次孫彩試將作監主簿制

勅某爾祖以九卿歸第而遺奏以爾爲言顧哀舊臣而官使其子孫此先王使仕者世祿之意而吾之所不忘也其使試于工官之屬以稱爾祖之志焉詩曰無念爾祖聿修厥德爾方就學可不勉哉可

司農卿致仕余良孺遺表曾孫渙試將作監主簿制

勅某爾之曾祖仕至九卿退處于家考終厥命推恩及爾以試工官往愼猷爲且膺器使可

故光祿卿致仕張溫之孫基試將作監主簿制

勅某爾祖嘗爲侍從之臣而有公忠之節今其亡矣秩爾以官能善似之乃其無悔可

客省使眉州防禦使張亢遺表孫在至塋並將作監

主簿制

勅某爾祖起於文吏而能以才武致力於封疆扞患之功書在王府今其亡矣故各命爾一官往懋爾成毋忘爾祖之勤於國可

司農卿致仕魏琰男太廟齋郎紆守將作監主簿

制

勅某爾世載榮祿而父以九卿去位推恩改命序位工官維恪慎可以保家往其勉矣可

虞部員外郎致仕張應符男通試將作監主簿制

勅某少盡其力至於老則養之不可以不終使之免農而爲士則祿之不可以不世此先王不忍人之政而吾未能逮也今爾父去位而命爾一官使得世其祿以終爾父之養焉此亦庶幾有合乎先王之政爾惟忠惟孝尙稱吾命爾之意哉可

職方員外郎致仕徐仲容男公輔試將作監主簿制

勅某爾父辭祿而爲爾請命于朝傳曰君子之善善也長

故善善及子孫此吾命爾以一官之意也經曰事親孝故忠可移於君居家理故治可移於官爾其念此以自勉哉可

虞部員外郎致仕李卓男元之試將作監主簿制

勅某爾父積勤序于郎位老而致事錄爾一官思世厥家往其無怠可

諸州軍并轉運提刑弟姪男恩澤等並試監簿制

勅某朕始嗣位推恩宇內爾執方貢以來造朝加賜一官往惟祗服可

王孝叔充春州軍事推官通判春州兼知本州制

勅某南方荒遠之州吏多憚往而爾請行焉故優爾祿賜

而以勸賞隨其後往其勉矣思父我民可

縣尉李執中可察推制

勅某先王之政荒則緩刑至于疆不忌死而傷吾良民則去之亦不可以不急此朕所以嚴追胥之令信購賞之科不以歲凶多暴之時而爲之廢格爾能除盜實舉其官遷以懋功往祗乃服可

呂開權淄州軍事推官依前充鎮南軍節度推官制

勅某爾有除盜之功故賞以一邑而序官于大府辭而有請以便爾私吾用不違往其祗服可

蘇州長洲縣尉富翺潤州丹徒縣令制

勅某朕布爵賞之令以待吏之有勞爾能舉其官以除盜

三國川集卷五十二
賊遷以爲令使之牧民又將試爾爲政之才非特示朕報功之信可

晉州襄陵縣尉葛頤單州武城縣令制

勅某爾職在追胥而能上功中率畀之一縣以懋爾能夫爲令之所事則不特追胥而已必也使人無盜是乃能稱其官可

杭州於潛縣尉趙君序號州玉成縣令制

勅某予嘉爾之有功於追胥也故畀爾邑於東南又從爾父之請焉而移爾於號吾於用賞而顧恤爾私亦云備矣則爾之施於有政可不勉哉可

信州鉛山縣尉齊景甫杭州餘杭縣令制

勅某爾追胥有功遷令一邑百里之人視爾以爲休戚矣施於政事可不勉哉可

單州成武縣令李燾江陰軍錄事參軍制

勅某爾修其官能中賞率有司會課予懋爾功愈其勉哉以涖厥事可

潞州屯留縣尉李昌言徐州錄事參軍制

勅某爾能捕盜當得賞官遷督一州之郵往其思稱厥職可

殿前都虞候利州觀察使賈逵依前官充侍衛親軍

步軍副指揮使制

勅朕有貔虎熊羆之士以衛中國而制四夷考之古人以

制統督幕府某久更任使才武有稱扞城之勞宿衛之最簡于先帝以暨朕躬思懋厥修往膺休顯可

衛州防禦使錢晦霸州防禦使制

勅朕初卽位奉行先帝故事以勞天下雖疎且遠無遺矣又況於朝廷之顯者哉具官某忠勞奕世簡在帝室能勵厥德自昭于時膺此寵章愈其思勉可

東上閣門使陵州團練使李端慤眉州防禦使制

勅朕初嗣位奉行故事以勞天下具官某清明敏達和慎祗修奉侍先帝陟降左右厥勤茂矣其可忘哉膺服寵榮往欽乃服可

捧日左廂都指揮使嘉州團練使周翰制

先帝棄天下朕初嗣位永惟武力忠勞之士爲國禦侮其功多矣豈可以忘哉具官某部督有方踐修無過營衛之最簡于朝廷膺此寵章愈其奮勵可

天武左第三軍都指揮使封州刺史程榮可蒙州刺

史充御前忠佐馬步軍副都軍頭制

勅某等熊羆之士爲國爪牙均其逸勤率用成法爾等忠勞之實簡在朝廷遷序有差往惟欽服可

轉員制

先帝遺朕熊羆之士以蕃帝室所使統督豈可以非其人哉爾等以扞城之材共禁衛之服忠勞武力皆有可稱各以序遷往欽無懈可

落權團練刺史制

勅某等忠勞之士武力之臣獎衛帝室其功多矣當序厥位以均逸勤爾等部督有方踐修無過兵團州刺遷進有差往膺寵榮懋建勳績可

單州團練使劉永年可齊州防禦使知代州制

勅代地邊要吾所重常擇將以守之以爾具官某武力智謀濟以馴謹踐更中外皆有可稱故進使號往共厥服禦侮之實爾其勉哉可

捧日天武四廂都指揮使端州防禦使趙滋可依前

充侍衛親軍步軍都虞候制

勅營衛之士皆天下武力之高選也所使虞度軍中之事

者豈可以非其人哉具官某等造行謹良致位休顯勳勞之實簡在朕心各以序遷往惟祇服可

